

A Ezio Bortolussi

ANGELO VIANELLO

O ai vût il plasê di cognossi Ezio Bortolussi, midiant l'amî comun Dani Pagnucco, inte ocasion dal so percors pal conferiment de *laurea honoris causa* in inzegnarie civîl che i à dât la Universitât dal Friûl. Ce che mi à un vore colpît al è stât il fat che, di “migrant”, al è stât bon di promovi dal nuie, in Canadà, une straordenarie ativitât tal setôr edilizi. Cheste, tal timp, si è concretizade te realizazion di plui di tresinte grancj gratecî che a àn vût sucès pes lôr cualitâts estetichis e pes tecnologjiis originâls dopradis.

Ezio Bortolussi mi à maraveât soledut pes sôs dotis umanis che, di ce che mi è stât contât, al à simpri pandût, prime di dut tai confronts dal personâl. Maestrancis che, a nivei diferents di competence e responsabilitât, a àn savût realizâ chestis oparis ediliziis imponentis, fasintlu diventâ famôs in Canadà e in dut il mont.

Chest so mût di operâ e di rapuartâsi aes personis che a interagjissin cun lui al à une lidrîs profonde te culture de sô tiere, il Friûl, e che propit par chest si pues riassumi te locuzion nobile: “Furlan, salt, onest e lavoradôr”. Ezio al è pal sigûr “salt”, o ben un om determinât che, ancje tra dificolts e impreviscj inevitabii, al à savût lâ daûr cun grant coraç ai obietîfs de sô vite e, in particolâr, a chei leâts ae sô ativitât di imprenditôr edil. Lu à fat, di ce che mi risulste, simpri cun grande atenzion, “onestât” e gjenerositât viers i siei dependents, dutis dotis che a fasin di lui un “grant lavoradôr” che al fâs onôr ae sô Patrie.

Tai incuintris che o ai vût cun Ezio Bortolussi lui al à simpri dimostrât autorevolece e dignitât, dôs dotis che, tra l'altri, al à simpri palesât cun

grande umiltât. Par dutis chestis resons o soi onorât di vêlu come amî sincîr e content pe laurea che la mê Universitât i à conferît.

Angelo Vianello

Za professôr te Universitât di Udin